

1 YOOHANE

Yoohaneefa indaaruga akara rumannimaqoo ufafa.

Yoohaneefa Yisuna faqa nidanoo aikuqum-maseeno akara rumaqoo ufafa.

¹ Qinee kaqi marira ufa anoonara Yisunara akara rumasee qimannimidaqa. Mi kaqi marira ufana Yisufa oqai maa maqa maqafa sia marunakina marufa maridanoo qinee mi ufana qimannimidaqa. Maasa mi ufana anoona qifunnai qafeeqa daaqoonnai iriqiafana. Maasa qifu qafamasee qisaukunnai akooqoo kaqi marirana anoona marufaqa auqamasee qafeeqa qimannimidaqa.

²⁻³ Yisufa mi kaqi marira anoonafa kooroomafufaqa maasa mina qafeeqaramma inni qimannimidaqa. Mifa naaru naaru marirana anoona nari akoona Anutuna faqa marufa maasaki maa maqanasaa kooroomafunara minara inni qimannimidaqa. Maasa mina qafaafanna ainainara iriafanna ainainnara inni faqa qimannimidaqa. Maasa faqa mina akoona Anutufa faqa amaaku asaku mundirana faqa moodaanaki innisaimbaqa mariraree qimasee inni qimannimidaqa.

⁴ Innee faqa maasa faqa innisaimbaqa naundurair asirafa qumbiqaanifeera inni maa ufana akara rumannimaqaidaqa.

Anutufa kaaqa qarafa maridanoo.

⁵⁻⁶ Anutuna amaaku ufa moo maasa qimaqimu-faqa maasa mina akooroomasee inni qimannimidaqa. Mi ufana maaqi qinoo Anutufa kaaqa qarafa qoomara foora sia kaqikaa asukuna marifa maridanoo. Mi ufana qimaqiminau. Maasa qeeqara Anutuna faqa aqoondi fee qimasee quandaki asukunaki keeqafidaqa maasa ufa faqa marirana faqa unna qidaqa, sia anoonamau fidaqa.

⁷ Maasa Anutuna aanna reeqa suanisaa rakeeiraqoo nunausa moodaanaki marinausa maridaqa nariara nariara aqoondi kammiga maridaqa. Maasa Anutuna aanna reeqa kaaqa qara qoo fimarunanoo nari amaaku Yisuna fidika fannoo maasa aaqarana numoo aiqama findaukaidanoo.

⁸ Maasa nariara sia mandainaina marifaqee qidaqa narakaru narakaru qidaqa Anutuna anoona ufa sia maasaki maridanoo unna ufa kai maasaki maridanoo.

⁹ Maasa nari mandainaina oosana oosana Anutuna akooroomma nisainanoo mifa andeeqee marifa maridanoo andeeqa qimaqaannoo mifa maasa numoo taika qiseenoo maasa mandainaina aiqama anukama qisaannoo nari ufamau andeeqasee fimarifa maridanoo mi mau fuannoo.

¹⁰ Anutufa maasa aiqamausara aaqee mariasee kai qidanoo. Maasa nariara sia aaqee marunausee qimariana Anutunara unna qimari fee qidaqa miqi qidaqa mina ufa anoona sia maasaki marifaqa miqi qidaqa.

2

Yisufa maasa aaqarana andeeqarufa qimaqoo ufafa.

¹ Qini faiqi namu sia innee aaqaqeera maa ufana akara ridaqa. Yisufa asauku mundirafa andeeqarafa Anutuna afusaa maasufa dadaaqu fasiqafa maridanoo faiqí faqa anaasee faqa moo fannoo aaqaifannoo Yisufa minara iriseenoo maasa qikoofinnai oonureenoo maasa aaqarana andeeqa taikaannoo.

² Anutuna asauku mundirafa mifa kai aandau tatufirafara foora maridanoo. Minannai maqasaa fasiqa anaasee mandainaina akiqara taikanniseenoo doo maasa Anutufinnai mafi qisaidanoo. Sia maasaindi kai aiqama anaamurundi minannai kai taikannisaaninafa maridanoo.

³ Maasa Anutuna ufa iriseeqa mi mau fidaqa kuqaa Anutunara iridee qianauro.

⁴ Faiqí faqa anaasee faqa moo fannoo Anutuna aqoondi fee qimasee sia Anutuna ufamau finafa mifa unna qimarifa sia anoona ufa minaki marifa maridanoo.

⁵ Anutuna ufara eedoo qimasee mi mau finafa kuqaa Anutunara rimarifa mifa anoonaikinoo mariannoo. Maasa maaqi qimaseeqa maridaqa kuqaa Anutunaki maridee qianauro.

⁶ Faiqí faqa anaasee faqa moo fannoo qinee kuqaa Anutunaki maridee qimasee mifa asauku mundirana aanna ranoo marinaqa kuqaa Anutunaki marifa maridanoo, sia asauku mundirana aanna rainafa unna qimarifa maridanoo.

Yoothaneefa fuka naakaparufa qimaqoofa.

⁷ Qini qifaaqasaa qiqoondiuqa. Maa ufana sia fuka ufa maridanoo innee oosanaindari iri maria ufafa maridanoo. Ooqeenaa ufa irimariafa maridanoo.

⁸ Maa fuka ufafa ooqeenanasaa ootupamasee inni qimannimidaqa akara ridaqa. Maa fuka ufana anoona asauku mundiranaki kooroo inoo maridanoo inniki faqa koorooma nimaqaidanoo, doo asukuna afaqaidanoo fuka kaaqa qarafa qoomara foora inni qambaanai qaidanoo.

⁹ Mi fukufana maaqimminoo maridanoo. Moo fannoo nariara Yisuna kaaqa qaranaki maridee qidanoo quandafi narí akaqaafasaa fidiqaa inafa mifa sia kaaqa qaranaki maridanoo asukunaki kaqi maridanoo.

¹⁰ Moo fannoo narí akaqaafasaa rinafa mifa faasaana miqiranasaa maridanoo, sia minaki aiku amaki aqufirafa mariannoo.

¹¹ Narí akaqaafasaa fidiqaa imaria fasiqa anaaseesa asukunakiara foora maridaqa, asukunaki nidaqa firannai anirannaira randaidaqa mikimakanidaqa asukuna fannoo misa nifusaa ititanoo marifaqa miqidaqa.

¹² Qini faiqi namu, qinee inniara akara ridaqa. Inni mandoosanara Anutufa narí asauku mundiranara iriseenoo doo inni mandoosana aqiqaara mininnisoonara qinee inni akara ruman-nimaqaidaqa.

¹³ Innee faiqí firaasa indaaruu Yisuna ufa irusa inni akara rumannimaqaidaqa. Innee Yisunara ooqai oosana arooqooqari marinara irimariasaa mariafaqa minara inni akara rumannimaqaidaqa. Qinee inni kumaaraauqa

faiqi namuara akara rumannimaqaidaqa. Innee aakaaqaindaraa fasiqa uraaqaramafuanara inni akara rumannimidaqa.

¹⁴ Qinee inni faiqi namu faqa akara rumanni-maqaidaqa. Innee inneeqa nikoona Anutunara irimariafaqara akara rumannimaqaidaqa. Innee faiqi fraasa innee Yisunara oosana arooqooqari marinara irimariasa mariafaqa minara inni akara rumannimaqaidaqa. Qinee inni ku-maaraauqa faqa akara rumannimaqaidaqa. Innee nimudaanai qimariasa mariafaqa Anutuna ufa inni mariranaki marifa maridanoo innee aakaaqaindaraa fasiqa uraaqaramafuasa marianara inni akara rumannimaqaidaqa.

¹⁵ Innee sia maa maqa maaganasaaqaraa mandirirana mariranara ruaqa. Minaki mari ainainnara faqa sia ruaqa. Innee maa maqa maaganasaaqaraa manda iriranara rimarifanoo Anutunara rirafa sia inniki mariannoo.

¹⁶ Maa maaganasaaqaraa mandainaina oosana maqimminoo maridanoo. Maasa manda daundurakiqari oosana oosana ainainara randeemarunnanara faqa maasa oosana oosana ainaina qafamasee marararee qimarunnanara faqa maasa nifaaqa amooqimariana faqa maa ainainausa aiqama sia maasa qikoofinaindari qumu mari ainainafa maridanoo aiqama maa maaganasaaqaraa ainaina kai maridanoo.

¹⁷ Maa maqa maaganaki maria mandirirana marina ainainausa faqa faiqi nidimari mandainainausa faqa doo taikanoo qumidanoo kasooqaqee firaaqoo taikaannoo. Faiqi fee anaasee fee moo fannoo Anutuna iriranamau

fimarifa sia maa maqa maaqana namuqaqa taikaanno, kaqi naaru naaru mariannoo.

Asauku mundirana namuqaara qimaqoo ufafa.

¹⁸ Qini faiqi namu, taikara aukwana adeediranoo maridanoo. Ooqai asauku mundirana namuqaa uriqararafa aniannoo fee qimasee qimannimifannana doo maqee mina namuqaa moomoo kooroomafi maridaqa. Maasa mina qafeeqa taikara aukwana adeediranoo maridanoo fee qidaqa.

¹⁹ Mi namuqaasa maasaki mariusa rakeemaki namuqaakiqau. Misa maasaki maridaqa sia maasa irirana amiqimasee maroosa marusa. Misa kuqaa maasaindi maridau maasaki kaqi marini. Anutufa maasa dadaaqianee qimasee misa qumeenni niqiqoofaqa maasakiqari rakeemakufaqa fufanoo Anutufa minannoo misa mandoosana kooroo inau.

²⁰ Innee sia misa naanna ree mariasa mariafanoo asauku mundirafa kuqaa nari naaquqara andeeqara maraqunna inni naakunnimaqee marifaqa mariafanoo innee Yisuna anoonufara irimariafanoo.

²¹ Innee Yisuna anoona ufa sia irifaqau sia akara rini irimarianara akara rumanni-maqaidaqa. Sia unna ufa moo fannoo anoona ufakiqari kambiqaidanoo. Innee minara faqa irimariasa mariafanoo.

²² Yafee unnufa qimarifa maridanoo Yisunara sia Anutuna asauku mundira fee qimarifa mifa unna ufa qidanoo asauku mundirana namuqaa maridanoo.

²³ Miqi qimarifa sia mina amaakuara kaifau qaoo qidanoofau mina akoona Anutunara faqa qaoo qimarifa maridanoo. Faiqí fee anaasee fee moo fannoo mina amaaku marainafa mina akoona Anutuna faqa maraannoo.

²⁴ Ooqai indaaruu Yisuna ufa iriusa mifa inni naunduraki marinara amiqimasee rakisiaqa. Yisuna ufa irufa inni naunduraki marinaqa doo innee minannai amaaku faqa narí akoona faqa atukarasee miqandaki marifaranoo.

²⁵ Marifanoo asauku mundirafa narí uqanna moo ainaina maa ainainna naaru marirana qimiraree qinuu.

²⁶ Akaqausa inni ueeqasee nikaru qimarifaqa maana minara qimannimidaqa akara rumannimaqaidaqa.

²⁷ Qinee inniara iridaqa asauku mundirafa narí ufa inni naakunnimaqoofanoo maridanoo. Mina ufa fannoo inniki maridanoo sia fifau moo fannoo aana inni uqannifiqaannoo. Mina ufa fannoo narí kai aiqama ainaina anoona ainaina faqa unna ainaina faqa rainasee qimannimidanoo sia moo unna qidanoo. Innee Yisuna ufa irisee eedoo kai qiaqa. Miqidaqa asauku mundiranaki kaqi mariaqeera qidaqa.

²⁸ Oo qini faiqinamu Yisunaki mariafanoo kaqi minaki kai mariaqa. Miqi marifanoo narí innaarunaindari quminaqa sia innee nisaurusee kukeeqaaqa kaqi nifaaqa quqasee qafaaqa.

²⁹ Innee asauku mundiranara irimariafanoo mifa andeeqeemarifa maridanoo. Innee maanara faqa doo iriaqa, faiqí fee anaasee fee moo

fannoo andeeqara oosana marainafa mifa faqa Anutuna faiqiara foora maridanoo.

3

Yoohaneefa maasa Anutuna faiqi namuara qi-maqoo ufafa.

¹ Innee qafaaqa maasa qikoofa Anutufa firaaqoo maasara amuqusifanoo rimarifa maridanoo. Maasara firaaqoo amuqusifanoo maasara nari faiqi namu fee qidanoo. Maa maqa maaganasaaqaraasa Anutunara sia irunnanara mina faiqi namu maasara faqa sia iridaqa.

² Qini qifaaqasaa qiqoondiuga, maqee maria aukwana Anutuna faiqi namu maridaqa. Kasooqaqee innaarunai mina faiqi namu maridaqa nana amiqira ainaina fee moo faqa ootupamma qimiannoo fee maasa sia minara iridaqa sia akooqoo maridanoo. Moodaa ainaina kai maasa iridaqa. Asaku mundirafa innaarunaindari kooroinaqa maasa mifara foora marianaura. Maasa mina nari uqanna raquramisee qafamasee minara nari fooqaanaikammianaura.

³ Maqee maria kamuqoo asaku mundirana asasammasee afeesara mariasa minara indee indee idaqa nariqa mandoosana findaukaqa fi-daqa.

⁴ Moo fannoo aqee marifa Anutuna ufa ruki-aidanoo aqaaidanoo. Qaqaqarana oosana oosana fannoo Anutuna ufa rukiara maridanoo.

⁵ Asaku mundirafa sia fifau kooroinau, maasa aqee marunnana mara aquaneera kooroinau, minaki sia aqarafa maridanoo innee minara irimariafanoo.

⁶ Minara maasa asauku mundiranaki mariasa sia kaqi mandainainaki nidaqa. Yafa yafee kaqi mandainainaki nida fee mifa asauku mundiranara sia irifa sia uqanna minara irimarifa maridanoo.

⁷ Qini faiqinamu nikaru qimari fasiqafa anireenoo inni ueeqaandoo qimasee maana inni qimannimidaqa aufariaqee qidaqa andeeqara qoo nimariasa andeeqarausea maridaqa asauku mundirana aanna rausea andeeqarausea mariaqa.

⁸ Yafa yafee mandaikiraqoo kaqi nimarifa mifa Sadannaindi maridanoo, Sadannafa nikaruqirafa maridanoo nikaruqiannoo. Ooqai oosana arooqooqari mandainainaki nimarifa Sadannafa maridanoo Anutufa nari amaaku maa ainainnara maa maqanasaa koorooinau, Sadannana mandainainirana arutaikaanifeera maa maqanasaa koorooinau.

⁹ Yafa yafee Anutuna faiqi maridanoo fee sia mi fasiqafa mandaikiraqoo nidanoo. Anutuna oosana anoona uqanna minaki maridanoo, Anutufa mina akoofa marinara sia amana mandaikiraqoo fimariannoo.

¹⁰ Doo qinee maqee Anutuna faiqi namufaqa Sadannana faiqi namufaqa akooroomasee qimannimidaqa. Faiqi anaasee moo fannoo sia andeeqara qoo nimarifa sia Anutuna faiqi maridanoo, nari akaqaafasaara faqa sia uriqarara ainainee qimaseenoo minara sia amuqusimarifa mifa sia Anutuna faiqi maridanoo.

Yoothaneefa maasara nariara nariara nimuqusiaqee qimaqoo ufafa.

¹¹ Ooqai indaaruu maa ufana innee irimarusa mariafanoo mi ufana oosana maaqimminoo maridanoo maasa nariara nariara uriqarara ainainee qimasee nimuqusiani.

¹² Maasa sia Kaina aanna raa, mifa Sadannana faiqi maridanoo nari akaqa arinau. Kainafa nanaree nari akaqa arinoo fee inau. Nari auqoo ainaina mandaikufanoo, mina marirafa nirafa eendaandinoo marunara nari akaqa nirafa marirafa andeeqanoo marunara minasaara aanoomaseenoo arinau.

¹³ Qini qikaqaafasaa uqa maa maqa maaqanakinaasa inniara fidiqaafa qaa siamma innee minara tautiaqa. Kaina oosana maraifaqa misa inniara fidiqaammifaranoo.

¹⁴ Maasa kuqirana minniseeqa kaqi mariranaki ani maridaqa. Maasa nariara nariara andeeqasee qimuqusunnanara minara maasa kaqi mariranaki animaridaqee qidaqa. Yafa yafee nariara nariara sia andeeqasee amuqusinafa kaqi kuqiranaki maridanoo sia anikeeqaidanoo.

¹⁵ Yafee faiqi moo fannoo nari akaqaafasaa fidiqaa imarinafa mifa doo kuqa nari marifa maridanoo. Innee maana iridaqa faiqi kuqa nari mariasa sia naaru marirafa misaki maridanoo.

¹⁶ Maasa nariara nariara uriqarara ainainee qimasee nimuqusira oosana maaqimminoo maridanoo. Asaku mundirafa maasara amuqusidanoo nari marirana maasara aunirira saqarisaa quqasee kuqinau. Doo maasa faqa miqi kai iqa maasa qeeqa qikaqaafasaa Yisuna ufa irimariasa mina ufasaara kuqiranaki firariafaqa maasa misa rafaafunni maqasee kaqi mariaqee

qimasee misa nimaaga maqasee kuqanaura.

¹⁷ Moo fannoo ainaina narí amanasaa maqeeifa narí akaqaafasaa sarauqiranaki marina qafamasee qimudaoo qimasee amiraree qimasee narí amuqusirana amuqusinanoo narí amuqusa muqufi rafaqafuseenoo sia dadaaqinoo, naqimasee miqinna fasiqafa Anutunara qini qimuqusaki maridanoommifoo qiannoo fee. Sia amana maridanoo.

¹⁸ Qini faiqi namu, maasa nariara nariara uriqarara ainainee qimasee rirana sia afaurun-nai kai qia. Asaukunnai anoona ainaina kai narí ami narí ami iranannai kai mina anoona kooroo inoo kambiqaannoo.

Yoothaneefa maasara Anutuna afusaa paasoosiaqee qimaqoo ufafa.

¹⁹ Maasa miqiannanannai kuqaa anoonasaa atooaga maridee qianaura. Maasa miqiannanara maqoo nidaqa maridaqa Anutuna afusaa mirinni maridanoo maasa qiqafainaga paasoosianaura.

²⁰ Maasa aqamasaanoo maasa qimuqusa darinanoo Anutufa qimuqusa uriqararafa maridanoo maasa aiqama ainainara irimarifa maasara amuqusinoo sia daruannoo.

²¹ Maasa qimuqusirafa sia darinaqa Anutuna afusaa paasoosammianaura.

²² Paasoosidaqa maasa nana ainainaree sarau ianna ainainnara innaaru qiananoo Anutufa maasa qimiannoo. Maasa mina ufara qimuqu-sannoo eedoo qimasee Anutuna aidimari oosana

maraidaqa iraanna ainainara qiananoo mifa qimiannoo.

²³ Anutufa maa naakaparufana maasa qimaqiminau. Innee qini qimaaku Yisuna qini qisauku mundiranara inneeqa irirana minasaa rusisee quandaki narí mina ufamau fiqa nariara nariara uriqarara ainainee qimasee nimuqusi-qqee qinau.

²⁴ Yau yausee Anutuna naakapara ufamau fimarinausa misa Anutunaki marifanoo kafaa Anutufa misaki maridanoo. Anutufa narí maraquna nimiqoona minara Anutufa maasa daunduraki maridanoo fee qidaqa.

4

Unna maraqunara faqa kuqaa maraqunara faqa rainaaninnanara qimaqoo ufafa.

¹ Qini qifaaqasaa qiqoondiufa. Moomoosa náriara Anutuna maraquna maasaki marisee qimariana sia mina irisee aiqamausara kuqaam-mifoo qiaqa. Innee misa nimanamasee qafaaqa kuqaa Anutuna maraquna fee moonaa maraquna fee misaki maridanoo fee. Unna qimaria tamummaqarausa aiqamai daraanammiga marianara qimannimidaqa.

² Innee maaqimasee nimanamasee qafaaqa, kuqaa fee Anutuna maraquna misaki maridanoo fee. Ooqai maa maqa maaqafa sia maruqoo Anutufa innaarunai Yisunasaa asauku munduseenoo kasooqagee anee aiqama maqasaqaraasa asumu mareena fee qimaseenoo mina qimaminau. Doo maqee inniki moo fannoo maa akooqooqaraanara Yisunara

mifammifoo qinafa mifa Anutuna maraquna faqaafa mariannoo.

³ Moo fannoo aqara ufa qinafa asauku mundiranara sia miqi marifa maqasaa fasiqa faiqi fee qinafa mi fasiqanaki sia Anutuna maraquna marifa maridanoo. Mi fasiqafa asauku mundirana namuqaa maridanoo. Ooqai maasa mi fasiqanara aniannoo mifoo qiafanaqa iriusa mariafanoo maqee doo kooroo mandee ani maridanoo.

⁴ Qini faiqi namu innee Anutuna faiqi namu mariafanoo. Unna qira tamummaqara fasiqauqa innee misa urinaaqaramafi mariasa, inniki mari maraqunafa uriqaranoo maridanoo maa maqa maaqanakinaasa maraquna Sadannaindi ureqanoo maridanoo.

⁵ Misa maa maqa maaqanakinaa iriranamau ufa qimariafaqa maa maqa maaqanakinaasa misa ufa iridaqa moodaa maqannaasa maridaqa.

⁶ Maasa Anutunaindi maridaqa Anutunara irimari fasiqafa maasa ufa iridanoo. Yau yausee sia Anutunaindi mariasa misa sia maasa ufa iridaqa. Doo maasa miqimandee anoona maraquna faqa unna qira maraquna faqa rainasee iridaqa.

Maasa nariara nariara nimuqusirana anoona Anutufa maridanoo.

⁷ Oo qini qigoonduqa, maasa andeeqasee nariara nariara uriqarara ainainee qimasee ruaqa. Nariara nariara nimuqusirafa Anutunasaqari animari ainainafa maridanoo. Nariara nariara andeeqara amuqusimarifa Anutuna faiqi maridanoo minara irimarifa maridanoo.

⁸ Faiqí moo fannoo sia andeeqasee amuqusi-nafa sia Anutunara iridanoo. Nimuqusirana anoona uqanna Anutufa maridanoo.

⁹ Anutufa narí amuqusira oosana maasa uqaqifiqeenoo. Mifa narí amaaku moodaa faiqi maa maqa maaqanaki aqiqamasoofanoo maasara kaqi marirana mina Yisunannai maraaqee qimasee aqiqoofanoo guminau.

¹⁰ Andeeqara amuqusirana anoona maaqimmi-noo maridanoo. Sia maasa Anutunara uriqarara ainaina fee qimasee rimariqiafana. Anutufa naaree maasara amuqusufanoo narí amaaku aqiqeenoo minannai maasa mandainaina aki-aqara dariraree quna mina mara aquanifeera aqiqoofanoo guminau.

¹¹ Qini qifaaqasaa qiqaondiuqa. Anutufa maasara miqimasee firaqqoo amuqusunara maasa miqi kai iqa quandaki nariara nariara uriqarara ainainee qimasee qimuqusiani.

¹² Sia moo fannoo Anutuna qafoose mari-daqa maasa nariara nariara riranannai Anutufa maasaki maridanoo mina amuqusirana anoona doo maasaki anoonaikinoo maridanoo.

¹³ Maasa maaqi qimaseeqa Anutunara kuqaa maasaki marifaqa maasa minaki maridee qianauranoo. Mifa narí maraquna maasa qimunara maasa minaramma irianaara.

¹⁴ Maasa maa ainainna qafeeqa aiqama qiman-nimidaqa maasa qikoofa narí amaaku aqiqeenoo maa maqa maaqanasaqaqaraasa mandainainaki mariasa qumareeqee uqeeraani fee qimasee aqiqanau.

¹⁵ Ya fasiqa anaasee fee maa maqanasaqari

Yisunara kuqaa Anutuna faiqi fee qinafa Anutufa minaki maridanoo mifa faqa nariki maridanoo.

¹⁶ Anutufa maasara amuqusirana maasa qeega minara iridaqa kuqaa fee qimasee minasaa mundidaqa. Anutufa nimuqusirana anoono marinara yafa yafee nariara nariara andeeqara amuqusiranaki marifa mifa Anutunaki faqa marifa maridanoo, kaifaa Anutufa minaki maridanoo.

¹⁷ Anutuna amuqusirafa sia fifau maasaki anoonaikidanoo. Anutuna ufa irira faasaana sia nari afusaa rufiaaqeera paasoosiaqeera mina amuqusirafa maasaki anoonaikidanoo. Maaqoo maria kamuqoo maasa marirafa Yisunaindi miqirafa maridanoo nariara nariara andeeqara nimuqusiranaki anoonaikinoo maridanoo. Nariara nariara andeeqara nimuqusira oosana sia maparaairafa minaki maridanoo.

¹⁸ Moonara rufiarafa sia kaqi kambiqaidanoo maasa manda ainaina akiqara daruandoo qimasaida rufiidaqa. Maasa maqasaa didimari fasiqanara sia rufiidaqa maasa didirafa rufiarana afaqasaifanoo didirafa kai maridanoo. Anutufa maasara amuqusimarifanoo maasara ridanoo. Maasa Anutunara rufiidaqa Anutufa maasara rimarina sia iridaqara miqidaqa, Anutufa maasa dari marifaqara foora minara rufiidaqa.

¹⁹ Anutufa indaaru maasara amuqusunara maasa minara irisee kuqaa fee qimasee quandaki Anutunara faqa nariara nariara faqa uriqarara ainainee qimasee ridaqa nimuqusidaqa.

²⁰ Moo fannoo qinee Anutunara uriqarara ainainara rida fee qimasee quandaki nari

akaqaafasaara fidiqaa inafa unna qirafa mariannoo. Mifa narí afu qafee marina narí akaqaafasaa ririmma sia amuqusidanoo minau Anutuna sia qafee marina naqimandee fifau amuqusiraree sia amana.

²¹ Doo minara qinee qidaqa. Asauku mundirafa maa naakaparufana maasa qimaqimiqoona inni qimannimidaga. Ya fasiqa anaasee fee Anutunara uriqarara ainainee qimasee rinafa mifa quandakinoo narí akaqaafasaara uriqarara ainainee qimasee faqa ruannoo.

5

Maa maqa maaqanasaaqaraa mandainaina uriqarara ufa.

¹ Yafa yafee Yisunara Anutuna asauku mundira fee qinafa mifa Anutuna faiqi mariannoo. Moo fannoo akoonara rinafa mifa mi fasiqana faiqiara faqa ruannoo.

² Maasa maaqiannanara Anutuna faiqi namuara ridaqee qianauro. Anutunara nimuqusi-naqa mina ufamau andeeqasee fuannanara Anutuna faiqi namuara ridaqee qianauro.

³ Maasa Anutunara ruannana anoona maaqiminoo maridanoo. Mifa naakapainna ufara eedoo qimasee asaukunnai qumaraannanara doo mifa anoona maridanoo. Anutuna naakapara ufa sia firaa qumaara tia maridanoo aufadaidanoo.

⁴ Maasa Anutuna faiqi namu maa maqa maaqanasaaqaraa mandainaina amana maasa mina uraaqaraanaura. Maa ainainannai maasa maa maqa maaqanasaaqaraa mandainaina

uraaqaraidaqa, Yisuna saqarikiranannai uraaqaraidaqa.

⁵ Yafasiqa anaasee fee maa maqa maaqanakinaa mandainaina uraaqaraannoo fee. Akooqooqaraana Yisunara Anutuna amaaku fee qinafa mifa maa maqanasaaqaraa mandainaina uraaqaranoo mariannoo.

Yisunara Anutufa mina amaaku marunara kooroou ufafa.

⁶ Maa Yisufa asauku mundirafa nari anoona aranandakiqari fidika nammarisaaqari kambiqanau sia nammari kaifau nammari namufaqa fidika namufaqa apirirafa kambiqanau.

⁷ Anutuna maraquna fannoo kuqaa anoona ufa imarufa maridanoo mina koorooinau.

⁸ Qaaramoo ainaina kooroo imarifa maridanoo. Mi qaaramoo namufa moodaa ainainara kai qidaqa, mi namusa maraquna faqa nammari faqa fidika faqa maridaqa.

⁹ Maaqoo kootaki ufa qimariasa ufa iridaqa kuqaa fee qidaqa. Faiqi ufa marinanoo Anutuna ufa fannoo faiqi ufa uriqaranoo marinara mifa akooqooqaraana Yisunara qini qimaaku uqannee qimaqoofa marinara maasa minara kuqaa anoonee qimasee irianauro.

¹⁰ Yafa yafee Yisunara Anutuna amaaku fee qinafa nari aundurakinaafa faqa dadaaqinanoo kuqaa anoonee qiannoo. Yafa yafee Yisunara sia Anutuna faiqi fee qinafa mifa Anutunara unna qimari fasiqafee qidanoo Anutufa nari

amaakuara qu ufanara unna fee qidanoo miqi qidanoo.

¹¹ Anutufa narí amaakuara qu ufafa maaqimminoo maridanoo Anutufa naaru naaru kuqaa marirana maasa qiminau, mi marirafa maa-saindi mina amaakuki marifa maridanoo.

¹² Yafa yafee Anutuna amaaku qumarainafa doo mifa mi marirana namufaqa qumareenoo. Yau yausee sia Anutuna amaaku qumarainausa sia mi marirana faqa qumaraidaqa.

Sarau inna ainaina Anutuna innaaru qinanoo amiannoo.

¹³ Innee Anutuna amaakuara irirana rusimari-asa innee doo naaru marirana doo maree fee qiaqeera maa ufana akara rumannimaqaidaqa.

¹⁴ Maasa Anutuna iriranasaa maaqoo moo ainainara innaaru qinanoo kuqaa maasa qimi-annoo maasa iridaqa, miqiannanara maasa Anutuna afusaa sia rufiaidaqa paasoosamasee innaaru qidaqa.

¹⁵ Maasa Anutunara moo ainainara innaaru qinanoo mifa iriannoo. Maasa minara iridaqa iraanna ainainna kuqaa qimiannoo fee qidaqa.

¹⁶ Faiqí moo fannoo moo mandoosana mareemarina sia andeeqasee kuqiranaki fimaria mandoosana marasainanoo mina akaqaafasaa fannoo qafamaseenoo Anutunara innaaru qinanoo mina mandainaina ateeka rukaiseenoo narí marirana amiannoo. Qinee kuqiranaki sia andeeqasee fimaria mandoosannara qidaqa. Andeeqasee kuqiranaki fimaria mandoosana maridanoo moo fannoo mi mandoosanna marinaqa innee sia minara innaaru qiaqa.

¹⁷ Aiḡama aaḡarafa mandoosana maridanoo akaḡausa moo mandoosana sia kuḡiranaki fi-mariafa maridanoo.

¹⁸ Maasa maana iridaḡa sia Anutuna faiḡi namu mandoosana maḡee maḡee maraḡa fidaḡa. Anutuna amaaku ititasaifanoo manda fasiḡa fanoo sia amana mina mandaikamamaḡaannoo.

¹⁹ Maasa maana iridaḡa maasa Anutuna ainaina maridaḡa. Maa maḡa maaḡanaki mariasa aiḡama manda fasiḡa aakaḡakinaa fasiḡa aramandunnai maridaḡa.

²⁰ Maasa maanara iridaḡa asauku mundirafa Anutuna amaaku uḡanna maasa Anutunara iri-aḡeera mina irirana ḡiminau. Doo maḡee maasa Anuḡuna amaaku asauku mundirana Yisunaki marianara moodaanaki kuḡaa anoona Anutunaki maridee ḡidaḡa. Miḡiḡa maasa anoona Anutunaki faḡa anoona asumu mariranaki faḡa maridaḡee ḡidaḡa.

²¹ Qini faiḡi namu unna ḡira Anutufara fooḡaa ḡira ainainara nianasaa rufiaḡa, kuḡaa Anutuna inni nimuḡusakinaana mara amaaramaseenoo mina amaḡa maḡaandoora minara rufiaḡa.

Fúka Moodaanaki Kira Ufa Afaqínaasa Ufa
Portions of the Holy Bible in the Binumarien
language of Papua New Guinea
Buk Baibel long tokples Binumarien long Niugini

copyright © 1983, 2001, 2017 Wycliffe Bible Translators, Inc.

Language: Binumarien

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-10

PDF generated using Haiola and XeLaTeX on 18 Apr 2025 from source files dated 31 Aug 2023

4a891130-f25d-5e30-a81c-882b2e037698